

«Nominaziun Premi schurnalistic SRG.R»

■ Il Cussegl dal public (CP SRG.R) è sa fatschentà en sia emprima seduta dal 2014 cun l'emissiun da sport «Sportissimo» dal Radio Rumantsch (RR). Medemamain ha il CP nominà las tschintg propostas per il Premi schurnalistic SRG.R che vegn surdà ils 26 da mars 2014 per l'emprima giada. Il premi vegn surdà per products schurnalistics da RTR Radiotelevision Svizra Rumantscha. Il magazin da sport «Sportissimo» dal Radio Rumantsch vegn emess adina la sonda e dumengia tranter las 17.00 e las 18.00 e la dumengia tranter las 12.00 e las 12.30. Ils moderaturs – en spezial sursilvans – persvadan en lur moda da manar tras l'emissiun e provan d'intermediar a l'auditor quai che capita en il mund dal sport regional. Quai na gartegia betg adina perquai ch'ins lascha vegnir a pled cun prioritad ils stars da la scena svizra da sport. Il Cussegl dal public SRG.R giavi-

schass dapli reportaschas da giuvens talents da sport dal Grischun. Medemamain duess vegnir infurmà anc dapli d'occurrentzas da sport regionalas. Quai che persvada è dentant las intervistas cun atlests rumantschs, sco p. ex. cun *Dario Cologna* ed auters, e tuns originals d'eveniments da sport d'impurtanza naziunala. Ulteriuras infurmaziuns en connex cun las emssions pon ins lura era tadlar sin la pagina d'internet rtr.ch.

Il Premi schurnalistic SRG.R 2013 onurescha products schurnalistics da la chasa RTR. La giuria che consista da tschintg commembers dal CP SRG.R ha tadlà e guardà tut las propostas. Inoltradas èn vegnidadas bun 30 contribuziuns. La giuria ha fatg ina tscherna e nominà tschintg propostas per quest premi che vegn surdà en questa furma per l'emprima giada. Da questas propostas tschernan lura tut ils commembers dal CP SRG.R il victur. Il

premi è dotà cun 6000 francs e po vegnir surdà per contribuziuns en las categorias radio, television ed online. Il premi schurnalistic SRG.R vegn surdà mesemna, ils 26 da mars 2014 en la Chasa da medias RTR a Cuir. Nominads per il premi èn: «555 onns Val Schons – ed ussa?» *Casper Nicca* (Online) «Allegra Rumantschs» *Livio Foffa/David Spinnler* (Radio) «Marella: Da primblas e fifis en il DRG» *Anna Serarda Campell* (Radio) «La stgargiada da Breil» *Otmar Seiler* (Television) «Si cheu sun jeu libers – Clau Scherrer» *Gieri Venzin* (Television)

A chaschun da la proxima seduta che ha lieu il matg 2014 s'occupa il CP SRG.R cun l'applicaziun da las directivas linguisticas tar RTR Radiotelevision Svizra Rumantscha. Per quest intent èn vegnidadas furmadas trais gruppas da lavur idiomaticas che vegnan a s'occupar cun il diever dals linguatgs tar RTR.